



N°477
Entrée le 14.03.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 15.03.2024
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 14/03/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministere fir Justiz & Famill, Solidaritéit an Integratioun weiderzeleeden.

Ech hunn schon a fréiere Froen no Erklärungen zur Aarbecht vun den Dierwiechter gefrot (n°3177 an 6753).

Mam Gesetz vum 4ten Dezember 1990 iwwert d'Organisatioun vun den Dierwiechter an dem ofgeännerte Reglement vum 24ten Januar 1991, ginn d'Präisser, déi Dierwiechter dierfe froen, festgehalten. D'Dierwieschter mussen awer keng Bilanen virleën, an de Justizministère deem se ënnerstallt sinn, weess net wéi vill si mat hiren Etüde verdéngen.

D'Dierwiechter brauche fir hir Aarbecht awer och d'Ënnerstëtzung vu Polizist:innen, zum Beispill wann et zu Zwangsräumunge kënn. D'Stonnen, déi d'Polizist:innen hei leeschten, sinn also ee Käschtefacteur fir de Staat.


An deem Zesummenhang wéilt ech de Ministeren dës Froe stellen:

1. Wéi oft hunn an deene leschte 5 Joer musse Polizist:innen den Huissieren zur Säit gestallt ginn? Wéi vill Stonnen Aarbecht ass hei fir d'Andriewung vun de Scholde geleeest ginn?
2. Gëtt de Staat fir dës Aarbecht vun de Polizist:innen vun den Huissieren entschiedegt?
3. Am Fall wou eng Famill muss hiert Doheem verloosse well et versteet ginn ass, gëtt hei direkt den Office social vun der Famill informéiert? Wa jo, wéini gëtt den Office social iwwert d'Situatioun informéiert?
4. Ass d'Regierung der Meenung, dass d'Aufgabe vun den Dierwiechter:innen sollt an den Aufgabeberäich vun de staatleche Justizautoritéiten zrëck kommen? Wéll d'Regierung den Dierwiechterstatut verstaatlechen?

Mat déiwem Respekt,



www.piraten.lu



GOERGEN Marc
Deputéierten





Äntwert vun der Madamm Elisabeth MARGUE, Ministesch fir d'Justiz, a vun dem Här Max HAHN, Minister fir Famill, Solidaritéit, Zesummeliewen an Accueil, op d'parlamentaresch Fro n°477 vum 14. Mäerz 2024 vun dem honorabelen Deputéierten Här Marc GOERGEN

1. Zu dësem Punkt gi keng Statistike gefouert.

2. Nee.

D'Dierwiechter kënnen op Polizist:innen zeréckgräife fir Gerichtsurteeler ze exekutieren.

Wann den Dierwiechter sech muss Zougang zu engem Gebai verschafen („si les portes sont fermées, ou si l'ouverture en est refusée“), wat och op Basis vun engem Urteel geschitt, ass d'Präsenz vun engem Polizist oder enger Polizistin laut Artikel 723 vum „Nouveau Code de procédure civile“ obligatoresch.

3. Am Fall wou eng Famill hir Wunneng verlosse muss, ass et esou, datt op lokalem Plang an éischter Linn d'Gemenge betraff sinn. D'Gemenge gi vum Dierwiechter iwwert den Datum informéiert, wou den Déguerpissement soll stattfannen.

D'Missioun vum den Offices sociaux sinn am Artikel 7 vum Gesetz vum 18. Dezember 2009 iwwert d'Aide sociale definéiert. Am Fall, wou eng Famill hir Wunneng verlosse muss, kann den Office social op verschidden Aart a Weisen hëllefen, wéi zum Beispill:

- duerch eng materiell oder finanziell Ënnerstëtzung,
- duerch Berodung, esouwéi duerch eng Begleedung bei administrativen Demarchen a bei der Ufro vu sozialen Hëllefen,
- andeems en, falls néideg an an der Limitt vun de legale Konditiounen, eng Referenzadress ufreet a sécherstellt, datt d'Persounen hir sozial Rechter behalen,
- andeems e sech ëm eng kuerzfristeg a kuerzzäiteg Noutënnerbréngung këmmert, falls d'Famill selwer keng Méiglechkeet fënnt ënnerdaach ze kommen.

Et ass heibäi wichteg ervirzehiewen, datt d'Hëllef awer op Demande vun der concernéierter Persoun selwer muss geschéien.

Am Kader vun der Déguerpissementsprozedur gëtt den Office social net explizit ernimmt an och net automatesch a Kenntnis gesat.

Wann een Office social iwwert een Déguerpissement informéiert gëtt, geschitt dat an der Praxis an deene meeschte Fäll entweder duerch d'Gemengen, duerch déi betraffe Leit selwer oder och mol duerch den Dierwiechter. Den Zäitpunkt ass heibäi vu Situatioun zu Situatioun verschidden. Op Demande vun der Gemeng, de Leit oder dem Dierwiechter kann den Office social zum Beispill

während dem Déguerpissement präsent si fir sech ëm d'Leit ze bekëmmen. Virun allem wa Kanner am Spill sinn ass dat gären de Fall.

4. D'Destinatäre vun der Fro sinn net där Meenung. Si wëllen den Dierwiechterstatut net verstaatlechen.

Lëtzebuerg, den 17 Abrëll 2024.

D' Justizministesch

(s.) Elisabeth Margue